

La'ó Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Díli, Timor-Leste

Tel: +670-3321040 ka +670-77234330 (mobile) email: laohamutuk@gmail.com

Website: www.laohamutuk.org



Díli, 25 Novembru 2025

**Hato'ó ba : Sua Exelénsia Prezidente da Repúblika Demokrátika Timor-Leste (RDTL)
Sr. Dr. José Ramos-Horta**

Asuntu : Pedidu atu Veta proposta Lei Orsamentu Jerál Estadu 2025

Ho respeito,

Liu husi biban ida ne'e La'ó Hamutuk hakarak hato'ó ami nia hanoin, analiza no rekomendasaun balu relasiona ho proposta Orsamentu Jerál Estadu 2025 nian, ne'e aprovalu ona husi Parlamentu Nasionál iha loron 20 Novembru 2024 liubá, no daudaun ne'e iha ona Exelénsia Prezidente Repúblika nian liman atu foti desizaun haktuir ba Konstituisaun RDTL artigu 88 atu fó apresiasaun tantu promulga ka veto tiha OJE 2025 nian.

Kuaze dékada rua ona, nasaun ida ne'e seidak másimu kore an husi problema estrutural sira, hanesan kiak multidimensional, malnutrisaun, kualidade edukasaun, sistema saúde, no infrastrutura bázika ne'ebé adekua ne'ebé bele kompleta no fasilita nesidade povu hotu nian. Governu iha diskursu sira hato'ó promesa furak kona-ba oinsá atu hadi'ak kualidade moris sustentável no ekitável ba ema hotu.

Infelizmente, promesa hirak ne'e la inklui iha estratéjia orsamentál OJE 2025 nian. Governu kontinua ho sira nian ambisaun atu fó oportunidade boot liu ba esperansa inserteza sira no despeza hirak ne'ebé durante ne'e seidak konsege lori retornu sosial no ekonomia ba nasaun, alokasaun iha OJE 2025 nian maioria kontinua ba despeza konsumtivu no mega projetu sira ba Tasi Mane nian, Suai Supply Base ho token \$40 iha 2025 no haktuir ba projesaun sei kontinua aumenta ba token \$145 iha 2026 no token \$227 iha 2027. Seluk mak Governu propoin osan ba kustu rehabilitasaun no konstrusaun ba aeroportu Suai ho token \$1.6 no aeroportu Díli ho token \$28 ne'ebé nia funsaun no utilidade sai dúvida boot ba oinsá responde nesidade urgente povu no nasaun ne'e nian?

Ami preokupa ba sustentabilidade finanseira husi Fundu Petrolíferu, ne'ebé haktuir ba Ministériu Finansa nian analiza katak bainhira Governu nian tendénsia levantamentu ho biliaun \$2.2 mak Timor-Leste sei hasoru rai-naruk fiskál durante dékada ida no bele lalais liu bainhira levantamentu kontinua sa'e no flutusaun negativu iha merkadu finanseiru internasionál.

Ami nota katak OJE 2025 nian maioria nafatin ba de'it despeza konsumtivu, liu-liu finansiamentu ba subsidiu pesoál hanesan veteranu sira ho token \$207. Levantamentu husi Fundu Petrolíferu kuaze kobra liu 80% iha despeza Estadu nian. Bainhira laiha Fundu Petrolíferu, sei estraga ita nian servisu públiku no ekonomia tomak.

Aleinde ne'e, subsídiu ba instituisaun sira kontinua iha dependénsia boot ba estadu hanesan alokasaun ba Timor Gap ne'ebé realidade sira nian balansu bainhira tinan 2023 remata mak tokon \$106 no iha OJE 2025 nian Governu propoin tan tokon \$16. Iha sorin seluk, empreza públika sira kontinua hetan oportunidade boot liu duké asuntu esensial sira hanesan saúde, edukasaun, bee moos no saneamentu ne'ebé hamutuk kuaze 19% husi total OJE 2025.

Ami hanoin katak Governu preziza sériu duni atu foti alternativu no hanoin ona oinsá povu no nasaun bele sobrevive bainhira laho Fundu Petrolíferu. Ami dúvida ho kometimentu Governu nian atu hakbiit ekonomia povu no nasaun nian liu husi polítika diversifikasaun ekonomia, ne'ebé realidade agrikultura nudár setór produtivu hetan de'it alokasaun tokon \$50 ka 2.2% husi total OJE 2025. Ami hanoin katak, Governu tenke sériu atu investe iha setór produtivu hanesan agrikultura, turizmu komunitária, no manufatura hodi bele ajuda ekonomia rai laran.

Ami triste bainhira Parlamentu Nasionál la sériu diskute asuntu urjénsia ba nesesidade povu no futuru naruk Rai doben nian, durante debate plenária to'o iha aprovasaun OJE 2025 nian. Parlamentu Nasionál, falta iha diskusaun saudavel atu diskute asuntu estratéjiku sira ne'ebé hadalan investimentu apropriadu ne'ebé bele harii aliserse ekonomia ne'ebé forte no ajuda redús problema estrutural sira ne'ebé ita hotu diskute hanesan kiak no malnutrisaun.

Ne'e duni ami husu Prezidente Repúblika atu uza kompeténsia konstituisional ne'ebé iha atu Veto proposta lei ba Orsamentu Jerál Estadu 2025 nian, atu fó fali oportunidade ba PN diskute fila fali no restrutura proposta lei OJE ba 2025. Tanba ami haree ba proporsaun OJE ne'ebé kontinua la hatuur povu nudár sentru iha polítika no prioridade ba povu no nasaun doben Timor-Leste. Asaun ida ne'e sei fó oportunidade ida tan ba Deputadu/a sira atu konsidera realidade ne'ebé povu no Estadu enfrenta iha rai doben Timor-Leste.

Atu kle'an liu ba razaun, analiza no ami nia rekomendasaun sira, ami aneksa mós ami nian submisaun ne'ebé hato'o ba Parlamentu Nasionál nudár referénsia atu ajuda sira durante diskusaun OJE 2025 nian.

Mak ne'e de'it, ami nia karta ami hato'o ba Sua Exelénsia Prezidente Repúblika, no ba konsiderasaun tomak ami hato'o obrigadu wain. Ami sempre prontu atu fahe informasaun ba Exelénsia karik hakarak ami atu halo audiénsia hodi hato'o ami nia perspetiva direta ho Sua Exelénsia Prezidente da Repúblika antes deside atu veto ka promulga Proposta lei ida ne'e.

Ami be saran lia,



Marta da Silva



Celestino Gusmão



Elizaria Febe Gomes



Charles Scheiner



Mariano Ferreira



Jonathan Gonsalves



Elia da Costa Araujo



Elivania Alves Correia

Anexu: Submisaun husi La'ó Hamutuk ba Parlamentu Nasionál kona-ba proposta Orsamentu Jerál Estadu ba tinan 2025